

Magaly Maduro, Coordinadora FHMD

Fundacion Hende Muher den Dificultad a yuda 144 cliente durante 2018



ORANJESTAD (AAN): Fundacion Hende Muher den Dificultad (FHMD) a yama un conferencia di prensa dialuna atardi unda Magaly Maduro, Coordinadora di e fundacion a duna di conoce cu awor cu aña a cuminza kier duna un actualizacion riba con 2018 a bay.

El a indica cu FHMD na 2018 a yuda 144 cliente. A duna alohamento den nan shelter na 24 señora y entre 25 cu 30 menor di edad cu a yega hunto cu nan mama.

Segun Maduro, e aña aki a cuminza y nan ta hopi conciente di e necesidad pa duna mas informacion y concientiza e pueblo pa cu e problema di violencia domestico.

Ta pesey cu e aña aki nan a inicia cu e campaña di concientizacion den cuadro di Valentine's Day y Carnaval. Maduro a agrega cu por corda cu aña pasa tabata tin varios caso di violencia domestico cu a impacta comunidad. A puntra e coordinadora di FHMD si nan a duna un siguimento na e casonan

aki.

El a bisa cu ta keda na cada persona si nan kier sigui haya guia di e fundacion ora tin un caso di abuso domestico presenta.

No tin ningun obligacion pa cu e fundacion pa sigui ningun guia cerca nan. Esnan cu yega na e fundacion, por yama haci afspraak y haya e oportunidad di tin un guia.

Aña pasa tabata tin varios caso y tabata tin casonan severo y e fundacion a haci un bon trabao den guia varios di e hende muhernan aki, a remarca.

Magaly Maduro a laga sa cu tambe tin casonan di hende homber pasobra no ta e señora so ta e victima. E hende homber tambe por ta un victima. E agresor tambe por tin "issues" y tin cu deal cu nan tambe.

E solucion ta pa tur hende, tur e actornan den e caso di violencia domestico haya e debido atencion y ayudo. "Asina si nos por resolve e problema cu ta basta duro, esun di violencia domestico".